

Rumantsch è ina lingua naziunala, ma ina lingua parzialmain uffiziala da la Confederaziun, numnadamain en la correspundenza cun persunas da lingua rumantscha. La translaziun d'in decret federal serva a l'infurmaziun, n'ha dentant nagina validat legala.

Lescha federala davart il servetsch d'infurmaziun (LSI)

dals 25 da settember 2015 (versiun dal 24 da mars 2020)

*L'Assamblea federala da la Confederaziun svizra,
sa basond sin ils artitgels 54 alinea 1 e 173 alinea 2 da la Constituziun federala¹,
suenter avair gi invista da la missiva dal Cussegli federal dals 19 da favrer 2014²,
concluda:*

1. chapitel Disposiziuns generalas e princips da la procuraziun d'infurmaziuns

Art. 1 Object

Questa lescha regla:

- a. l'activitatad dal Servetsch d'infurmaziun da la Confederaziun (SIC);
- b. la collauraziun dal SIC cun autres autoritads da la Confederaziun, cun ils chantuns, cun l'exterior e cun persunas privatas;
- c. la direcziun politica dal SIC sco er la controlla e la surveglanza da las activitads d'infurmaziun.

Art. 2 Intent

La finamira da questa lescha è la protecziun d'interess impurtants da la Svizra; ella ha l'intent:

- a. da contribuir a la preservazion da las basas democraticas e dal stadi da dretg da la Svizra ed a la protecziun dals dretgs da libertad da sia populaziun;
- b. d'aumentar la segirezza da la populaziun da la Svizra sco er dals Svizzers a l'exterior;

AS 2017 4095

¹ SR 101

² BBI 2014 2105

- c. da sustegnair l'abilitad d'agir da la Svizra;
- d. da contribuir a la protecziun d'interess da segirezza internaziunals.

Art. 3 Protecziun d'ulteriurs interess impurtants da la Svizra

En cas d'ina smanatscha greva e directa po il Cussegl federal laschar entrar en acziun il SIC per mantegnair auters interess da la Svizra ultra da quels menziunads en l'artitgel 2 cun l'intent da:

- a. proteger l'urden fundamental constituzional da la Svizra;
- b. sustegnair la politica exteriura da la Svizra;
- c. proteger la Svizra sco plazza industriala, economica e finanziala.

Art. 4 Autoritads e persunas pertutgadas

Questa lescha vala per las suandantas autoritads e persunas:

- a. autoritads da la Confederaziun e dals chantuns ch'èn incumbensadas d'exequir las activitads d'infurmaziun;
- b. autoritads da la Confederaziun e dals chantuns sco er organisaziuns e persunas dal dretg public u privat che disponan d'infurmaziuns relevantas per las activitads d'infurmaziun;
- c. persunas privatas ch'èn obligadas tenor questa lescha da transmetter infurmaziuns ch'èn relevantas per las activitads d'infurmaziun.

Art. 5 Princips da la procuraziun d'infurmaziuns

¹ Per ademplir sias incumbensas sa procura il SIC infurmaziuns tant da funtaunas d'infurmaziun accessiblas al public sco er da funtaunas d'infurmaziun betg accessiblas al public.

² En quest connex sa serva el da mesiras da procuraziun betg suttamessas ad in'autorisaziun e da mesiras da procuraziun suttamessas ad in'autorisaziun.

³ El tscherna mintgamai la mesira da procuraziun che:

- a. è adattada il meglier e necessaria per cuntanscher ina tscherta finamira da procuraziun; e
- b. intervegn il pli pauc en ils dretgs fundamentals da las persunas pertutgadas.

⁴ El po procurar datas da persunas, senza che quai saja perceptibel per las persunas pertutgadas.

⁵ El na procura e n'elavura naginas infurmaziuns davart l'activitat politica e davart l'execuziun da la libertad d'opiniun, da reunions u d'associaziun en Svizra.

⁶ El po procurar excepziunalmain infurmaziuns tenor l'alinea 5 davart in'organisaziun u davart ina persuna e las utilisar en ina moda che sa referescha a questa persuna, sch'i èn avant maun indizis concrets che quella organisaziun u persuna

exequescha ses dretgs politics per preparar u per exequir activitads terroristicas, activitads da spiunascha scumandadas u activitads d'in extremissem violent.

⁷ El stizza las datas ch'èn veginas utilas en ina moda che sa referescha a la persuna, uschespert che activitads tenor l'alinea 6 pon veginir exclusas, il pli tard però 1 onn suenter la registrazion, sche las activitads n'èn betg cumprobadas fin a quest termin.

⁸ El po er sa procurar e tractar infurmaziuns tenor l'alinea 5 davart organisaziuns e gruppaziuns inscrittas sin la glista d'observaziun tenor l'artigel 72 u davart lur exponents, sche las smanatschas che veginan represchentadas da questas organisaziuns e gruppaziuns pon veginir giuditgadas uschia.

2. chapitel Incumbensas e collavuraziun dal SIC

1. secziun

Incumbensas, mesiras da protecziun e da segirezza sco er armaziun

Art. 6 Incumbensas dal SIC

¹ La procuraziun e l'elavuraziun d'infurmaziuns dal SIC serva:

- a. a percepir ad ura ed ad impedir smanatschas da la segirezza interna u externa che veginan chaschunadas da:
 1. terrorissem,
 2. spiunascha,
 3. la derasazion d'armas nuclearas, biologicas u chemicas, inclusiv lur sistems pertadars, sco er tut la rauba e tut las tecnologias da gener civil e militar che pon veginir duvradas per construir questas armas (proliferaziun NBC) u dal commerzi illegal cun substanzas radioactivas, cun material da guerra u cun autre material d'armament,
 4. attatgas sin infrastructuras d'infurmaziun, da communicaziun, d'energia, da transport u d'auter gener ch'èn indispensablas per il funcziument da la societad, da l'economia e dal stadi (infrastructuras criticas),
 5. extremissem violent;
- b. a constatar, observar e giuditgar andaments a l'exterior ch'èn relevantes per la politica da segirezza;
- c. a proteger l'abilitad d'agir da la Svizra;
- d. a proteger ulteriurs interess impurtants da la Svizra tenor l'artigel 3, sch'igl è avant maun ina incumbensa concreta dal Cussegli federal per quai.

² Il SIC giuditgescha la situazion da smanatscha ed orientescha cuntuadament ils uffizis federales pertugads e las autoritads executivas chantunals pertugadas davart eventualas smanatschas sco er davart mesiras prendidas e planisadas tenor questa lescha. En cas da basegn alarmescha el ils uffizis statals cumpetents.

³ El infurmesccha – resguardond la protecziun da la funtauna – auters uffizis da la Confederaziun e dals chantuns davart andaments e davart enconuschienschas che

concernan las incumbensas legalas da queste uffizis per proteger la segirezza interna u externa.

⁴ El tgira, en connex cun il servetsch d'infurmazion, las relaziuns cun posts da servetsch da l'exterior.

⁵ El garantescha in preavertiment tras il servetsch d'infurmazion per proteger las infrastructuras criticas.

⁶ El realisescha programs per infumar e per sensibilisar davart smanatschas da la segirezza interna u externa.

⁷ El protegia ses collavuraturs, sias installaziuns, sias funtaunas e las datas ch'el tracta.

Art. 7 Mesiras da proteczion e da segirezza

¹ Il SIC prenda mesiras per garantir la proteczion e la segirezza da ses collavuraturs, da sias installaziuns e da las datas ch'el tracta. Per quest intent po el:

- a. far en sias localitads controllas da las tastgas e da persunas tar:
 1. collavuraturs dal SIC,
 2. persunas che lavuran per in temp limità per il SIC,
 3. collavuraturs d'interpresas che furneschan servetschs a favur dal SIC en sias localitads;
- b. far controllas en las localitads dal SIC per verifitgar, sche las prescripcions per proteger infurmaziuns classifitgadas veggan observadas;
- c. survegiliar cun video locals d'archiv, da tresor e da deposit sco er las zonas d'access a las localitads dal SIC;
- d. metter en funczion en las localitads che veggan duvradas dad el indrizs da telecommunicaziun disturbants tenor l'artitgel 34 alinea 1^{ter} da la Lescha da telecommunicaziun dals 30 d'avrigl 1997³.

² Il SIC maina ina rait da computer protegida per impedir che persunas nunautorisa-das hajan access a ses sistems d'infurmazion che ston vegin protegids spezialmain.

Art. 8 Armazion

¹ Per lur acziuns en Svizra dastgan ils collavuraturs dal SIC vegin equipads cun armas, sch'els èn exposts a periclitaziuns spezialas en il rom da lur funczion e da lur incumbensa uffiziala.

² Collavuraturs armads dastgan duvrar lur arma mo en cas da defensiu legitima u da situaziuns d'urgenza e mo en ina moda e maniera ch'è adequata a las circumstanzas.

³ Il Cussegl federal fixescha las categorias da collavuraturs armads sco er lur scola-zion.

2. secziun Collavuraziun

Art. 9 Autoritads executivas chantunalas

¹ Mintga chantun designescha in'autoritat che collavura cun il SIC cun l'intent d'exequir questa lescha (autoritat executiva chantunala). El procura che questa autoritat possia exequir las incumbensas dal SIC senza retard.

² Il SIC dat las incumbensas a las autoritads executivas chantunalas en scrit; en cas urgents po el dar ina incumbensa a bucca e confermar tala posteriuramain en scrit.

Art. 10 Infurmaziu dals chantuns

¹ Il Departament federal da defensiun, protecziun da la populaziun e sport (DDPS) infurmescha las conferenzas interchantunalas da las regenzas regularmain sco er en cas d'eveniments spezials davart il giudicament da la situaziun da smanatscha.

² Il SIC infurmescha las autoritads executivas chantunalas davart eveniments che concernan l'execuziun da lur incumbensas.

Art. 11 Collavuraziun cun l'armada

¹ Il SIC infurmescha las instanzas cumpetentas dal Servetsch d'infurmaziu da l'armada e dal servetsch da segirezza militara davart eveniments che concernan l'execuziun da lur incumbensas.

² En il sectur dals contacts militars internaziunals po el collavurar cun las instanzas da l'armada, po dumandar infurmazions da talas e dar ad ellas incumbensas per la collavuraziun internaziunala.

³ Il Cussegl federal regla:

- a. la collavuraziun ed il barat d'infurmaziuns tranter il SIC e las instanzas cumpetentas dal Servetsch d'infurmaziu da l'armada;
- b. la repartiziun da las incumbensas tranter il SIC ed il servetsch da segirezza militara durant in servetsch che promova la pasch, durant in servetsch d'assistenza u durant in servetsch activ.

Art. 12 Collavuraziun cun l'exterior

¹ En il rom da l'artitgel 70 alinea 1 litera f po il SIC collavurar cun servetschs d'infurmaziu e cun autoritads da segirezza da l'exterior per exequir questa lescha:

- a. cun prender encounter u cun dar enavant infurmaziuns utilas;
- b. cun far cuminaivlamain discurs spezials e dietas;
- c. cun realisar activitads cuminaivlas per acquirir e per evaluar infurmaziuns sco er per giuditgar la situaziun da smanatscha;

- d. cun acquirir infurmaziuns per il stadi che fa la dumonda e cun las dar vina-vant per giuditgar, sch'ina persuna po cooperar a projects da l'exterior clas-sifitgads en il sectur da la segirezza interna u externa u survegnir access ad infurmaziuns, a materialias u ad installaziuns da l'exterior classifitgadas;
- e. cun sa participar a sistems d'infurmaziun internaziunals automatisads en il rom da l'artitel 70 alinea 3.

² En enclegientscha cun il Departament federal d'affars exteriurs (DFAE) po el emploiar collavuraturs en las represchentanzas svizras a l'exterior per promover contacts internaziunals. Per exequir questa lescha collavuran quels directamain cun las autoritads cumpetentas dal stadi d'accoglientscha e da terzs stadis.

³ La collavuraziun cun servetschs d'infurmaziun esters per ademplir incumbensas dal servetsch d'infurmaziun tenor questa lescha è chaussa dal SIC.

⁴ Ils chantuns pon collavurar cun las autoritads da polizia estras ch'en cumpetentas per quai en cas da dumondas da segirezza en la regiun da cunfin.

3. chapitel Procuraziun d'infurmaziuns

1. secziun Mesiras da procuraziun betg suttamessas a l'autorisaziun

Art. 13 Funtaunas d'infurmaziun publicas

Funtaunas d'infurmaziun publicas èn en spezial:

- a. las medias accessiblas a la publicitat;
- b. ils registers da las autoritads da la Confederazion e dals chantuns ch'en accessibels a la publicitat;
- c. las collecziuns da datas da personas privatas ch'ellas han rendì accessiblas a la publicitat;
- d. las declaraziuns fatgas en la publicitat.

Art. 14 Observaziuns en lieus publics ed accessibels libramain

¹ Il SIC dastga observar andaments ed instituziuns en lieus publics ed accessibels libramain e far da quai registraziuns audiovisualas. El po utilisar per quai urdains sgulants e satellits.

² L'observaziun e la registraziun audiovisuala d'andaments e d'installaziuns ch'en dad attribuir a la sfera privata protegida n'en betg admessas. Registraziuns audio-visualas che ston vegnir attribuidas a la sfera privata protegida, che na pon per motivs tecnics però betg vegnir impedidas, ston vegnir destruidas immediatamain.

Art. 15 Funtaunas umanas

¹ Funtaunas umanas èn personas che:

- a. communitgeschan al SIC infurmaziuns u enconuschienschas;

- b. prestan servetschs per il SIC che servan ad ademplir las incumbensas tenor questa lescha;
 - c. sustegnan il SIC a procurar infurmaziuns.
- ² Il SIC po indemnissar adequatamain las funtaunas umanas per lur activitat. Sche quai è necessari per proteger la funtauna u per l'ulteriura procuraziun d'infurmaziuns, na valan questas indemnissaziuns ni sco entradas suffamessas a la taglia, ni sco entradas en il senn da la Lescha federala dals 20 da december 1946⁴ davart l'assicuranza per vegls e survivents.

³ Il SIC prenda las mesiras ch'èn necessarias per proteger corp e vita da las funtaunas umanas. Las mesiras pon er vegnir prendidas per persunas che stattan datiers a las funtaunas umanas.

⁴ Il schef dal DDPS po autorisar il SIC en il cas singul da dar a las funtaunas umanas, cur che la collauraziun è terminada, ina legenda u ina identitat da finta, sche quai è necessari per proteger il corp e la vita da las persunas pertutgadas.

⁵ Las mesiras tenor ils alineas 3 e 4 èn limitadas a la perioda da la periclitaziun concreta. Excepziunalmain poi vegnir desistì d'ina limitaziun temporara u ina mesira limitada temporarmain po vegnir midada en ina mesira illimitada temporarmain, sche las ristgas per las persunas pertutgadas èn spezialmain grondas e sch'i sto vegnir fatg quint ch'ellas existian vinvant.

Art. 16 Signalaments per tschertgar persunas ed objectcs

¹ Il SIC po publitgar il signalament da persunas e da vehichels en il sistem informatià da retschertga da la polizia tenor l'artitgel 15 alinea 1 da la Lescha federala dals 13 da zercladur 2008⁵ davart ils sistems d'infurmaziun da polizia federala (LSIP) sco er en la part naziunala dal sistem d'infurmaziun da Schengen tenor l'artitgel 16 alinea 2 LSIP.

² La publicaziun d'in signalament d'ina persuna u d'in vehichel è mo admess, sche indizis motivads èn avant maun, che:

- a. la persuna pertutgada represchenta ina smanatscha concreta per la segirezza interna u externa tenor l'artitgel 6 alinea 1 litera a;
- b. il vehichel vegn duvrà d'ina persuna en il senn da la litera a;
- c. il vehichel vegn duvrà per in'autra smanatscha concreta per la segirezza interna u externa tenor l'artitgel 6 alinea 1 litera a;
- d. igl è necessari da determinar il lieu, nua ch'ina persuna u in vehichel sa chatta per proteger ulteriurs interess impurtants da la Svizra tenor l'artitgel 3.

³ Il signalament na dastga betg vegnir publitgà per survegiliar il vehichel d'ina persuna che appartegna ad ina da las gruppas professiunalas menziunadas en ils artitgels 171–173 dal Cedesch da procedura penala svizzer (CPP)⁶.

⁴ SR 831.10

⁵ SR 361

⁶ SR 312.0

2. secziun Creaziuns da legendas ed identitads da finta

Art. 17 Creaziuns da legendas

¹ Il directur dal SIC po permetter ch'ils collavuraturs dal SIC veggian munids cun ina legenda, per che lur appartegnentscha al SIC na saja betg percorschibla.

² Ultra da quai po el permetter en enclegientscha u sin dumonda d'in chantun ch'il SIC muneschia cun ina legenda er appartegnents da las autoritads executivas chantunalas.

³ Per crear e per mantegnair ina legenda po il SIC far u midar documents. Las autoritads cumpetentas federalas, chantunalas e communalas èn obligadas da collavurar cun il SIC.

⁴ Il directur dal SIC rapportescha mintga onn al schef dal DDPS, co che las creaziuns da legendas veggan pratitgadas ed applitgadas.

⁵ Per mascrar l'appartegnentscha al SIC u ad ina autoritat executiva chantunala na dovri nagina permissiu speziala, sche quai vegg fatg senza duvrar documents ch'èn veggids creuds u midads spezialmain per quai.

Art. 18 Identitads da finta

¹ Il schef dal DDPS po permetter che las suandantas persunas veggian munidas cun ina identidad da finta, che las dat ina identidad, che divergescha da la vaira identidad, per garantir lur segirezza u la procuraziun d'infurmaziuns:

- collavuraturs dal SIC;
- collavuraturs da las autoritads executivas chantunalas che lavuran per incumbensa da la Confederazion, sch'il chantun respectiv è perencletg cun quai u sch'el dumonda quai;
- funtaunas umanas en il rom d'ina tscherta operaziun.

² L'identidad da finta po veginir duvrada uschè ditg, sco che quai è necessari per garantir la segirezza da la persuna pertutgada u la procuraziun d'infurmaziuns. Sia utilisaziun è limitata:

- a maximalmain 5 onns per collavuraturs dal SIC u dals organs da segirezza dals chantuns; la durada po veginir prolungada en cas da basegn mintgamai per maximalmain 3 ulteriurs onns;
- a maximalmain 12 mais per funtaunas umanas; la durada po veginir prolungada en cas da basegn mintgamai per maximalmain 12 ulteriurs mais.

³ L'utilisaziun d'ina identidad da finta per procurar infurmaziuns è admesa mo, sche quai pertutga in champ d'incumbensas tenor l'artitgel 6 alinea 1 e sche:

- la procuraziun d'infurmaziuns senza identidad da finta è restada senza success, fiss vana senza l'utilisaziun da l'identidad da finta u veggiss engrevgiada en moda sproporzionada; u

- b. in bain giuridic sco il corp e la vita u l'integritat corporala da la persuna ch'è fatschentada da procurar l'infurmaziun u d'ina persuna che stat datiers ad ella è smanatschà.

⁴ Per crear e per mantegnair ina identitat da finta po il SIC far u midar documents d'identitat, attestats ed ulterius documents sco er datas che sa refereschan a la persuna. Las autoritads cumpetentas federalas, chantunals e communalas èn obligadas da collavurar cun il SIC.

⁵ Il SIC prenda las mesiras necessarias per che las personas munidas cun ina identitat da finta na vegnian betg scuvridas.

3. secziun

Obligaziuns da dar infurmaziuns ed obligaziuns d'annunzia

Art. 19 Obligaziun da dar infurmaziuns en cas d'ina smanatscha concreta

¹ Autoritads da la Confederaziun e dals chantuns sco er organisaziuns, a las qualas la Confederaziun u ils chantuns han delegà l'adempilment d'incumbensas publicas, èn obligadas en il cas singuls da dar al SIC, sin sia dumonda motivada, quellas infurmaziuns ch'èn necessarias per percorscher u per dustar ina smanatscha concreta da la segirezza interna u externa u per proteger ulterius interess impurtants da la Svizra tenor l'artigel 3.

² Ina smanatscha concreta da la segirezza interna u externa è avant maun, sch'in bain giuridic impurtant sco il corp e la vita u la libertad da personas u l'existenza ed il funcziunament dal stadi è pertutgà e sche la smanatscha deriva da:

- activitads terroristicas en il senn da stentas per influenzar u per midar l'urden dal stadi che duain vegnir realisadas u favorisadas cun commetter u cun smanatschar grevs malfatgs u cun derasar tema ed anguscha;
- spiunascha tenor ils artigels 272–274 e 301 dal Cedesch penal svizzer (CP)⁷ sco er tenor ils artigels 86 e 93 da la Lescha penala militara dals 13 da zer-cladur 1927⁸;
- proliferazium NBC u commerzi illegal cun substanzas radioactivas, cun material da guerra u cun auter material d'armament;
- in'attatga sin ina infrastructura critica; u
- activitads d'in extremissem violent en il senn da stentas d'organisaziuns che refusan la basa democratica e dal stadi da dretg e che commettan, promovan u sustegnan acts violents per cuntanscher lur finamirras.

³ Las autoritads e las organisaziuns tenor l'alinea 1 èn obligadas da taschair envers terzas personas davart la dumonda dal SIC e davart infurmaziuns ch'èn eventualmain vegnididas dadas. Exceptada da quai è l'infurmaziun da posts superiurs e d'organs da surveglianza.

⁷ SR 311.0

⁸ SR 321.0

⁴ Ellas pon – senza ch'ellas sajan vegnidas intimadas – communitygar infurmaziuns, sch'ellas constateschan ina smanatscha concreta da la segirezza interna u externa tenor l'alinea 2.

⁵ Il Cussegli federal determinescha en in'ordinaziun las organisaziuns ch'èn obligadas da dar infurmaziuns; latiers tutgan en spezial organisaziuns dal dretg public e dal dretg privat che n'appartegnan betg a l'administraziun federala, uschenavant ch'ellas relaschan decrets u disposiziuns d'emprima instanza en il senn da l'artitgel 5 da la Lescha federala dals 20 december 1968⁹ davart la procedura administrativa u uschenavant ch'ellas adempleschan incumbensas d'execuziun ch'èn vegnidas delegadas ad ellas da la Confederazion; exceptads en ils chantuns.

Art. 20 Obligaziun speziala da dar infurmaziuns ed obligaziun speziale d'annunzia

¹ Las suandantas autoritads èn obligadas da dar infurmaziuns al SIC per che quel possia ademplir sias incumbensas:

- a. dretgiras, autoritads da persecuziun penala sco er autoritads da l'execuziun da chastis e da mesiras;
- b. guardias da cunfin ed autoritads da duana;
- c. autoritads da la segirezza militara, dal Servetsch d'infurmaziun da l'armada e dals fatgs da controlla militars;
- d. autoritads da la Confederazion e dals chantuns ch'èn cumpetentas per l'entrada en Svizra e per la dimora da persunas estras sco er per dumondas d'asil;
- e. autoritads che coopereschan ad incumbensas da la polizia da segirezza;
- f. controllas d'abitants;
- g. autoritads ch'èn responsablas per il traffic diplomatic e consular;
- h. autoritads ch'èn responsablas per permetter il traffic cun tscherta rauba;
- i. autoritads ch'èn responsablas per il funcziunament da sistems d'informatica;
- j. autoritads ch'èn responsablas per la surveglianza dal martgà da finanzas e per prender encunter annunzias en cas da suspect da la lavada da daners tar cas da finanziazion dal terrorissem e da finanziazion d'activitads da proliferaziun NBC a norma da la Lescha dals 10 d'october 1997¹⁰ davart la lavada da daners suspectus.

² Las autoritads tenor l'alinea 1 èn obligadas da taschair envers terzas persunas davart la dumonda dal SIC e davart infurmaziuns ch'èn eventualmain vegnidas dadas. Exceptada da quai è l'infurmaziun da posts superiurs e d'organs da surveglianza.

⁹ SR 172.021

¹⁰ SR 955.0

³ Las autoritads tenor l'alinea 1 communitygeschan – senza ch'ellas sajan vegnidas intimadas – infurmaziuns, sch'ellas constateschan ina smanatscha concreta e greva da la segirezza interna u externa.¹¹

⁴ Il Cussegli federal fixescha en ina glista betg publica, tge andaments e tge constataziuns che ston vegnir communitygads al SIC senza intimaziun da sia vart. El circumscriva la dimensiun da l'obligaziun d'annunzia e la procedura d'al dar infurmaziuns.

Art. 21 Secret professiunal

En cas d'infurmaziuns tenor l'artitgel 19 u 20 resta observà il secret professiunal protegi tras lescha.

Art. 22 Procedura en cas da divergencias d'opiniun tar las obligaziuns da dar infurmaziuns e d'annunzia

¹ En cas da divergencias d'opiniun tranter il SIC ed in'autra unitad da l'administratiun federala areguard l'obligaziun da dar infurmaziuns tenor l'artitgel 19 u 20 decida mintgamai l'autoritat da surveglianza cuminaivla definitivamain.

² En cas da divergencias d'opiniun tranter il SIC ed in'organisaziun, in organ u in'autoritat, che n'appartegna betg a l'administratiun federala, areguard l'obligaziun da dar infurmaziuns tenor l'artitgel 19 u 20 decida il Tribunal administrativ federal tenor l'artitgel 36a da la Lescha dals 17 da zercladur 2005¹² davart il Tribunal administrativ federal.

Art. 23 Annunzias ed infurmaziuns da terzas persunas

¹ Il SIC po prender encunter annunzias da mintga persuna.

² Cun dumondas a bucca u en scrit po el sa procurar sistematicamain infurmaziuns ch'el dovra per ademplir sias incumbensas. El po envidar en scrit persunas ad interrogaziuns.

³ El renda attent la persuna che vegn dumandada da dar infurmaziuns, ch'ella fetschia quai facultativamain; exceptà è la procuraziun d'infurmaziuns cun duvrar ina legenda.

Art. 24 Identificaziun ed interrogaziun da persunas

¹ Per ademplir sias incumbensas tenor l'artitgel 6 alinea 1 litera a po il SIC laschar tegnair si ina persuna per constatar sia identitat e per l'interrogar curtamain en il senn da l'artitgel 23.

² La fermada vegn fatga dals appartegnents d'in corp da polizia chantunals.

³ Il SIC po obligar la persuna tegnida si dad inditgar sias persunalias e da preschenttar ses documents d'identitat.

¹¹ La rectificaziun da la Cumissiun da redacziun da la AF dals 12 da mars 2020, publitgada ils 24 da mars 2020, concerna mo il text franzos (AS 2020 1057).

¹² SR 173.32

Art. 25 Obligaziuns spezialas da persunas privatas da dar infurmaziuns

¹ Sch'igl è necessari per percorscher, per impedir u per dustar ina smanatscha concreta da la segirezza interna u externa tenor l'artitgel 19 alinea 2 po il SIC pretender en il cas singuls las suandantas infurmaziuns e registraziuns:

- a. d'ina persuna natirala u giuridica che fa transports da professiun u che metta a disposiziun u intermediescha medis da transport: infurmaziuns davart ina prestaziun ch'ella ha furni;
- b. da gestiunaris privats d'infrastructuras da segirezza, en spezial d'apparats per transmetter e per registrar maletgs: la consegna da registraziuns inclusiv registraziuns d'andaments sin terren public.

² Plinavant po il SIC sa procurar infurmaziuns tenor l'artitgel 15 da la Lescha federala dals 18 da mars 2016¹³ davart la surveglianza da la posta e da la telecommunicaziun (LSPT).¹⁴

4. secziun Mesiras da procuraziun suttamessas ad in'autorisaziun**Art. 26 Geners da mesiras da procuraziun suttamessas ad in'autorisaziun**

¹ Per las suandantas mesiras da procuraziun dovri in'autorisaziun:

- a.¹⁵ survegliar il traffic da posta e da telecommunicaziun e pretender metadatas dal traffic da posta e da telecommunicaziun tenor la LSPT¹⁶;
- abis.¹⁷ applitgar apparats tecnics speziali per survegliar il traffic da telecommunicaziun cun l'intent da registrar communicaziuns, d'identifitgar u da localisar ina persuna u ina chaussa, premess che las mesiras da surveglianaza tenor la litera a sajan restadas senza success, fissan invanas u veginssan engrevgiadas sproporzionadamaen e premess che las permissiuns tenor il dretg da telecommunicaziun sajan avant maun per ils apparats tecnics speziali;
- b. applitgar instruments da localisaziun per constatar il lieu ed ils moviments da persunas u da chaussas;
- c. applitgar instruments da surveglianaza per tadlar u per registrar il pled che na vegen betg pronunzià publicamain ubain per observar u per registrar andaments a lieus betg publics u a lieus che n'èn betg generalmain accessibels;

¹³ SR **780.1**

¹⁴ Versiun tenor l'art. 46 cifra 2 da la LF dals 18 da mars 2016 davart la surveglianaza da la posta e da la telecommunicaziun, en vigur dapi il 1. da mars 2018 (AS **2018** 117; BBI **2013** 2683).

¹⁵ Versiun tenor l'art. 46 cifra 2 da la LF dals 18 da mars 2016 davart la surveglianaza da la posta e da la telecommunicaziun, en vigur dapi il 1. da mars 2018 (AS **2018** 117; BBI **2013** 2683).

¹⁶ SR **780.1**

¹⁷ Integrà tras l'art. 46 cifra 2 da la LF dals 18 da mars 2016 davart la surveglianaza da la posta e da la telecommunicaziun, en vigur dapi il 1. da mars 2018 (AS **2018** 117; BBI **2013** 2683).

- d. infiltrar sistems da computer e raits da computer per:
 - 1. sa procurar infurmaziuns ch'èn avant maun là u che veggan transmessas da là,
 - 2. disturbar, impedir u render pli plaun l'access ad infurmaziuns en cas ch'ils sistems da computer e las raits da computer veggan duvrads per attatgar infrastructuras criticas;
- e. perquirir localitads, vehichels u recipients per sa procurar objects u infurmaziuns ch'èn avant maun là u infurmaziuns che veggan transmessas da là.

² Las mesiras veggan fatgas en moda zuppada; la persuna pertutgada na vegg betg infurmada en chaussa.

Art. 27 Princip

- ¹ Il SIC po ordinar ina mesira da procuraziun suttamessas ad in'autorisaziun, sche:
 - a. igl è avant maun ina smanatscha concreta en il senn da l'artitgel 19 alinea 2 literas a–d u sche la protecziun d'ulteriurs interess impurtants da la Svizra tenor l'artitgel 3 pretenda quai;
 - b. la grevezza da la smanatscha giustifitgescha la mesira; e
 - c. ils scleriments dal servetsch d'infurmaziun èn stads senza success fin ussa, fissan vans uschiglio u veggissan engreviads en moda sproporziunada.

² Avant che realisar la mesira sa procura il SIC l'approvaziun dal Tribunal administrativ federal sco er l'autorisaziun dal schef dal DDPS.

³ Sch'igl è necessari che auters uffizis da la Confederaziun e dals chantuns coopere-schan tar la realisaziun da la mesira, als trametta il SIC in'ordinaziun en scrit, apaina che l'approvaziun dal Tribunal administrativ federal sco er l'autorisaziun dal schef dal DDPS èn avant maun. La mesira da procuraziun sto vegin tegnida secreta.

Art. 28 Ordinaziun da mesiras da procuraziun suttamessas ad in'autorisaziun envers terzas persunas

¹ Il SIC po er ordinar envers ina terza persuna ina mesira da procuraziun suttamessa ad in'autorisaziun, sch'i èn avant maun indizis motivads che la persuna, sur da la quala duain vegin procuradas infurmaziuns, dovrà localitads, vehichels u recipients da la terza persuna u las addressas postalas, ils attatgs da telecommunicaziun, ils sistems da computer u las raits da computer da quella persuna per transmetter, per retschaiver u per metter a salv infurmaziuns.

² La mesira na dastga betg vegin ordinada, sche la persuna appartegna ad ina da las gruppas professiunalas menziunadas en ils artitgels 171–173 CPP¹⁸.

Art. 29 Procedura d'approvaziun

¹ Sch'il SIC ha l'intenziun d'ordinar ina mesira da procuraziun suttamessa ad in'autorisaziun, suttametta el al Tribunal administrativ federal ina dumonda cun:

- a. l'indicaziun da la finamira specifica da la mesira da procuraziun e la motivaziun da sia necessitat sco er l'explicaziun, pertge ch'ils scleriments ch'en vegnids fatgs fin ussa n'hant gi nagin success, fissan uschiglio invans u vegnissan engreviads sproporzionadamain;
- b. l'indicaziun da las persunas ch'en pertutgadas da la mesira da procuraziun;
- c. la designaziun precisa da la mesira da procuraziun sco er da la basa legala;
- d. la designaziun d'eventuals auters uffizis che duain vegnir incumbensads cun la realisaziun da la mesira da procuraziun;
- e. l'indicaziun dal cumenzament e da la fin da la mesira da procuraziun sco er da la perioda, entaifer la quala ella sto vegnir realisada;
- f. las actas ch'en essenzialas per l'approvaziun.

² Il president da la partizun cumpetenta dal Tribunal administrativ federal decida sco derschader singul cun ina curta motivazion entaifer 5 dis da lavur suenter avair survegnì l'incumbensa; el po incaricar in auter derschader cun questa incumbensa.

³ Il president da la partizun cumpetenta dal Tribunal administrativ federal n'approvescha betg ina mesira da procuraziun dumandada, sch'ina tala mesira è già vegnida approvada sin basa d'ina procedura penala cunter la persuna pertutgada tenor l'alinea 1 litera b e sche l'inquisiziun penala ha in connex cun la smanatscha concreta che duai vegnir sclerida cun la mesira da procuraziun dal SIC. Las dretgiras da mesiras repressivas cumpetentas sco er il Servetsch da surveglianza dal traffic da posta e da telecommunicaziun dattan al Tribunal administrativ federal las infurmaziuns necessarias.

⁴ Il president da la partizun cumpetenta dal Tribunal administrativ federal po ordinar en il rom dal process da decisiun che represchentants dal SIC vegnan tadlads en chaussa.

⁵ El po conceder l'approvaziun cun condiziuns u pretender che las actas vegnian cumplettadas u che ulterius scleriments vegnian fatgs.

⁶ L'approvaziun vala maximalmain 3 mais. Ella po vegnir prolungada mintgamai per maximalmain 3 mais.

⁷ Sch'ina prolungaziun è necessaria, fa il SIC ina dumonda da prolungaziun motivada tenor l'alinea 1 avant che la durada permessa è scadida.

⁸ Il president da la partizun cumpetenta dal Tribunal administrativ federal fa mintga onn in rapport da lavur per mauns da la Delegaziun da las Cumissiuns da gestiun (DelCG).

Art. 30 Autorisaziun

¹ Sche la mesira da procurazion è approvada, decida il chef dal DDPS, suenter avair consultà ordavant il chef dal DFAE ed il chef dal Departament federal da giustia e polizia (DFGP), davart la dumonda, sche la mesira duai veginr dada liber per l'execuziun. Cas d'ina impurtanza speziala pon veginr suttamess al Cussegħ federal.

² La procedura da consultaziun sto veginr fatga en scrit.

Art. 31 Procedura en cas urgents

¹ Sch'il cas è urgent, po il chef dal SIC ordinar che las mesiras da procurazion suttamessas ad in'autorisaziun veginian appligadas immediatamain. El orientescha immediatamain il Tribunal administrativ federal ed il chef dal DDPS. Quel po terminar immediatamain la mesiras da procurazion.

² Il directur dal SIC suttametta la dumonda entaifer 24 uras al president da la partizun cumpetenta dal Tribunal administrativ federal e motivescha l'urgenza.

³ Il president da la partizun cumpetenta dal Tribunal administrativ federal communitescha sia decisiun entaifer 3 dis da lavour al SIC.

⁴ Sche la mesira da procurazion è approvada, decida il chef dal DDPS, suenter avair consultà ordavant il chef dal DFAE ed il chef dal DFGP, davart la dumonda, sche la mesira duai veginr dada liber per la cuntuaziun.

Art. 32 Terminaziun

¹ Il SIC terminescha immediatamain la mesira da procurazion suttamessas ad in'autorisaziun, sche:

- a. il termin è scadì;
- b. las premissas per cuntinuar cun tala n'èn betg pli ademplidas;
- c. ella na vegin betg approvada dal Tribunal administrativ federal u na vegin betg dada liber dal chef dal DDPS.

² En cas urgents procura il SIC che las datas procuradas veginan destruidas immediatamain, sche:

- a. il president da la partizun cumpetenta dal Tribunal administrativ federal refusa la dumonda;
- b. il chef dal DDPS terminescha immediatamain la mesira da procurazion u refusa da dar liber sia cuntuaziun.

³ Sche auters posts cooperesch an realisar la mesira da procurazion suttamessa ad in'autorisaziun, als communitescha il SIC cur ch'ella è terminada.

⁴ Il SIC communitescha al Tribunal administrativ federal seo er al chef dal DDPS che la mesira da procurazion è terminada.

Art. 33 Obligaziun d'annunzia

¹ Cur che l'operaziun è terminada, communitgescha il SIC entaifer 1 mais a la persona survegliada il motiv, il gener e la durada da la surveglianza cun mesiras da procuraziun suttamessas ad in'autorisaziun.

² El po suspender u desister da la communicaziun, sche:

- a. quai è necessari per betg periclititar ina mesira da procuraziun currenta u ina procedura giuridica currenta;
- b. quai è necessari pervia d'in auter interess public predominant per proteger la segirezza interna u externa u las relaziuns da la Svizra cun l'exterior pretendan quai;
- c. terzas personas pudessan vegnir periclitadas considerablamain pervia da la communicaziun;
- d. la persona pertutgada n'è betg cuntanschibla.

³ La suspensiun u la renunzia da la communicaziun sto vegnir approvada e deliberada tenor la procedura d'approvaziun tenor l'artitgel 29.

5. secziun Collavuraziun e protecziun da la funtauna**Art. 34 Collavuraziun e mandat per la procuraziun**

¹ Il SIC po exequir sez las mesiras da procuraziun, collavurar cun uffizis naziunals u da l'exterior u incumbensar quels cun l'execuziun da questas mesiras, sche l'auter uffizi porscha la garanzia d'exequir la procuraziun tenor las disposiziuns da questa lescha.

² Excepzionalmain po el er collavurar cun personas privatas u dar incaricas a personas privatas, sche quai è necessari per motivs tecnics u pervia da l'access a l'object da procuraziun e sche la persona respectiva porscha la garanzia d'exequir la procuraziun tenor las disposiziuns da questa lescha.

Art. 35 Protecziun da la funtauna

¹ Il SIC garantescha la protecziun da sias funtaunas e mantegna lur anonimitat, oravant tut quella da servetschs d'infurmaziun e d'autoritads da segirezza da l'exterior sco er da personas che procura infurmaziuns sur l'exterior e ch'èn periclitadas pervia da quai. Exceptadas èn personas che vegnan inculpadas en ina procedura penala da grevs crims cunter l'umanitat u d'in crim da guerra.

² Il SIC renda enconuschenta l'identitat d'ina funtauna humana che viva en Svizra ad autoritads svizras da la persecuziun penala, sche la persona respectiva vegn inculpada d'in delict che vegn persequità d'uffizi u sch'igl è indispensabel da render enconuschen l'identitat per sclerir in delict grev.

³ Tar la protecziun da funtaunas ston vegnir resguardadas:

- a. ils interess dal SIC da duvrar vinavant la funtauna per activitads d'infurmazion;
- b. il basegna da protecziun spezialmain da funtaunas umanas envers terzas persunas;
- c. en cas da funtaunas tecnicas: indicaziuns che ston vegnir tegnidias secretas davart l'infrastructura, davart la prestazion, davart las metodos operativas e davart proceduras da la procuraziun d'infurmazions.

⁴ En cas da disputa decida il Tribunal penal federal. Dal rest valan las disposiziuns decisivas davart l'assistenza giudiziala.

6. secziun

Procuraziun d'infurmaziuns davart andaments a l'exterior

Art. 36 Disposiziuns generalas

- 1 Il SIC po sa procurar en moda secreta infurmaziuns davart andaments a l'exterior.
- 2 Sch'il SIC sa procura en Svizra infurmaziuns davart andaments a l'exterior, è el lià a las disposiziuns da la 4. secziun; resalvà resta l'artitgel 37 alinea 2.
- 3 Il SIC procura che las ristgas da la procuraziun nastattan betg en ina disproporzion cun il gudogn d'infurmaziun spetgà e che las intervenziuns en ils dretgs fundamen-tals da persunas pertutgadas restan limitadas a quai ch'è indispensabel.
- 4 El documentescha la procuraziun d'infurmaziuns davart andaments a l'exterior per mauns dals organs da surveglianza e da controlla.
- 5 El po arcunar separadomain datas da procuraziuns a l'exterior che pon vegnir cumparegliadas cun mesiras da procuraziun suttamessas ad in'autorisaziun, sche la dimensiun da las datas, la discreziun u la segirezza pretenda quai.
- 6 Durant lur acziun a l'exterior èn ils collavuratur dal SIC ch'en activs a l'exterior assicurads cunter malsogna e cunter accident tenor la Lescha federala dals 19 da zercladur 1992¹⁹ davart l'assicuranza militara.
- 7 Il SIC procura per la protecziun da ses collavuratur ch'en activs a l'exterior.

Art. 37 Infiltrazion da sistems da computer e da raits da computer

- 1 Sche sistems da computer e raits da computer che sa chattan a l'exterior vegnan duvrads per attatgar infrastructuras criticas en Svizra, po il SIC infiltrar queste sistems da computer e questas raits da computer per disturbar, per impedir u per render pli plaun l'access ad infurmaziuns. Il Cussegl federal decida davart la reali-saziun d'ina tala mesira.

¹⁹ SR 833.1

² Il SIC po infiltrar sistems da computer e raits da computer a l'exterior per sa procurar infurmaziuns davart andaments a l'exterior ch'èn avant maun là u che veggan transmessas da là. Il schef dal DDPS decida, suenter avair consultà ordavant il schef dal DFAE ed il schef dal DFGP, davart la realisaziun d'ina tala mesira.

Art. 38 Exploraziun radiofonica

¹ La Confederaziun po manar in servetsch per registrar emissiuns electromagnéticas da sistems da telecommunicaziun che sa chattan a l'exterior (exploraziun radiofonica).

² L'exploraziun radiofonica serva a:

- a. procurar infurmaziuns che han ina relevanza per la politica da segirezza davart andaments a l'exterior, oravant tut dals secturs dal terrorissem, da la derasaziun d'armas da destrucziun en massa e da conflicts a l'exterior che han consequenzas per la Svizra;
- b. proteger ulteriurs interess impurtants da la Svizra tenor l'artitgel 3.

³ Il Cussegl federal regla ils secturs d'exploraziun, l'organisaziun e la procedura da l'exploraziun radiofonica. El fixescha quant ditg che las communicaziuns e las datas da colliaziun registradas dastgan restar arcunadas tar il servetsch che fa l'exploraziun radiofonica.

⁴ En quest connex garantescha el en spezial ch'il servetsch che fa l'exploraziun radiofonica transferescha da las communicaziuns registradas:

- a. mo infurmaziuns davart andaments a l'exterior che han ina relevanza per la politica da segirezza;
- b. mo infurmaziuns davart persunas en Svizra, sch'ellas èn necessarias per encleger in andament a l'exterior e sch'ellas èn veggidas anonimisadas ordavant.

⁵ Il servetsch che fa l'exploraziun radiofonica transferescha da las communicaziuns registradas infurmaziuns davart andaments en Svizra, sch'ellas renvieschan ad ina smanatscha concreta da la segirezza interna tenor l'artitgel 6 alinea 1 litera a.

⁶ Sch'el frunta tar sia activitat sin communicaziuns registradas che na cuntegnan naginas infurmaziuns davart andaments a l'exterior che han ina relevanza per la politica da segirezza e nagins renviaments ad ina smanatscha concreta da la segirezza interna, destruescha el quellas communicaziuns uschè svelt sco pussaivel.

7. secziun Exploraziun via cabel

Art. 39 Disposiziuns generalas

¹ Il SIC po incumbensar il servetsch che fa l'exploraziun da procurar infurmaziuns davart andaments a l'exterior che han ina relevanza per la politica da segirezza (art. 6 al. 1 lit. b) sco er per proteger ulteriurs interess impurtants da la Svizra tenor l'artitgel 3 da registrar signals transconfinais or da raits da cabel.

² Sche tant l'emettur sco er il retschavider sa chattan en Svizra, n'è l'utilisaziun dals signals registrads tenor l'alinea 1 betg admesa. Sch'il servetsch che fa l'exploraziun n'è betg en cas da zavrkar tals signals gia tar la registraziun, ston las datas procuradas vegnir destruidas, apaina ch'igl è cler ch'ellas derivan da tals signals.

³ Datas da signals registrads dastgan vegnir transferids al SIC mo, sche lur cuntengn correspunda a las noziuns da tschertga ch'èn vegnidias definidas per ademplir l'incumbensa. Las noziuns da tschertga ston vegnir definidas uschia che lur applicaziun chaschuna intervenziuns uschè pitschnas sco pussaivel en la sfera privata da persunas. Indicaziuns davart persunas svizras natiralas u giuridicas n'en betg admessas sco noziuns da tschertga.

⁴ Il Cussegl federal regla:

- a. ils secturs d'exploraziun admess;
 - b. l'organisaziun ed ils detagls da la procedura da l'exploraziun via cabel;
 - c. la durada maximala da la perioda, durant la quala il servetsch che fa l'exploraziun dastga conservar las registrazions da las datas da cuntegn e da colliaziun che derivan da l'exploraziun via cabel.

Art. 40 Obligaziun d'autorisazjun

¹ Incumbensas per far exploraziuns via cabel doyran in' autorisazion.

² Avant ch'il SIC dat l'incumbensa per inexploraziun via cabel, sa procura el l'approvazion dal Tribunal administrativ federal sco er l'autorisazion dal schef dal DDPS.

³ Il schef dal DDPS consultescha ordayant il schef dal DFAE ed il schef dal DFGP.

Art. 41 Procedura d'approvazjun

¹ Sch'il SIC ha l'intenziun da dar ina incumbensa per in'exploraziun via cabel, suttametta el al Tribunal administrativ federal ina dumonda cun:

- a. la descripcziun da l'incumbensa al servetsch che fa l'exploraziun;
 - b. la motivaziun da la necessitat da l'exploraziun;
 - c. l'indicaziun da las categorias da noziuns da tschertga;
 - d. l'indicaziun da las gestiunarias da raits da cabel e da las purschidras da servetschs da telecommunicazion che ston furnir ils signals ch'èn necessaris per far l'exploraziun via cabel; e
 - e. l'indicaziun dal cumentzament e da la fin da l'incumbensa.

² La procedura sa drizza tenor ils artitgels 29–32.

³ L'approvaziun vala maximalmaan 6 mais. Tenor la medema procedura po ella vegnir prolungada mintgamai per maximalmaan 3 mais.

Art. 42 Realisaziun

¹ Il servetsch che fa l'exploraziun prenda en consegna ils signals da las gestiunarias e da las purschidras tenor l'artitgel 41 alinea 1 litera d, transfurma els en datas e giuditgescha a maun dal cuntegn, tge datas ch'el transferescha al SIC.

² El transmetta al SIC mo datas che cuntegnan infurmaziuns concernent las noziuns da tschertga ch'èn vegnidas definidas per ademplir l'incumbensa. Infurmaziuns davart persunas en Svizra transmetta el al SIC mo, sch'ellas èn necessarias per encleger in andament a l'exterior e sch'ellas èn vegnidas anonimisadas ordavant.

³ Sche las datas cuntegnan infurmaziuns davart andaments en Svizra u a l'exterior, che renvieschan ad ina smanatscha concreta da la segirezza interna tenor l'artitgel 6 alinea 1 litera a, renviescha il servetsch che fa l'exploraziun quellas senza midadas al SIC.

⁴ Datas che na cuntegnan naginas infurmaziuns tenor ils alineas 2 e 3 ston vegnir destruidas uschè svelt sco pussaivel dal servetsch che fa l'exploraziun.

⁵ Per analisar las datas tenor criteris che servan a la procuraziun d'infurmaziuns è competent il SIC.

Art. 43 Obligaziuns da las gestiunarias da raits da cabel e da las purschidras da servetschs da telecommunicaziun

¹ Las gestiunarias da raits da cabel e las purschidras da servetschs da telecommunicaziun èn obligadas da dar al servetsch che fa l'exploraziun u al SIC indicaziuns tecnicas ch'èn necessarias per far l'exploraziun via cabel.

² Sche l'autorisaziun per ina incumbensa è avant maun, èn las gestiunarias da raits da cabel e las purschidras da servetschs da telecommunicaziun obligadas da furnir ils signals al servetsch che fa l'exploraziun. Ils criptadis fatgs dad ellas ston ellas allontanar.

³ Las gestiunarias da raits da cabel e las purschidras da servetschs da telecommunicaziun èn obligadas da tegnair secret las incumbensas.

⁴ La Confederaziun indemnisescha las gestiunarias da raits da cabel e las purschidras da servetschs da telecommunicaziun. Il Cussegli federal regla l'autezza da l'indemnasiun a norma dals custs per furnir ils signals al servetsch che fa l'exploraziun.

4. chapitel Elavuraziun da datas ed archivaziun**1. secziun****Princips, garanzia da qualitat ed elavuraziun da datas en ils chantuns****Art. 44 Princips**

¹ Il SIC e las autoritads executivas chantunals dastgan elavurar datas da persunas, inclusiv datas spezialmain sensiblas e profils da personalitat.

² Il SIC po cuntinuar ad elavurar infurmaziuns che sa mussan sco dischinfurmaziuns u sco infurmaziuns faussas, sche quai è necessari per giuditgar la situaziun u ina funtauna. El designescha las datas respectivas sco betg correctas.

³ El po transferir las medemas datas en plirs sistems d'infurmazion. Valair valan las prescripziuns dal sistem d'infurmazion respectiv.

⁴ El po correlar las datas entaifer in sistem d'infurmazion ed evaluar quellas en moda automatisada.

Art. 45 Garanzia da qualidad

¹ Il SIC giuditgescha la relevanza e la correctadad da las datas da persunas, avant ch'el las registrescha en in sistem d'infurmazion. Communicaziuns che cuntengnan pliras datas da persunas giuditgescha el globalmain, avant che las registrar en l'archiv da datas.

² El registrescha mo datas che servan ad ademplir las incumbensas tenor l'artitgel 6, resguardond l'artitgel 5 alineas 5–8.

³ El eliminescha datas che na dastgan betg vegnir registradas en in sistem d'infurmazion u trametta quellas enavos al speditur per far ulteriurs scleriments u elavuraziuns en atgna cumpetenza.

⁴ El controllescha periodicamain en tut ils sistems d'infurmazion, sche las unitads da datas da persunas registradas èn vinavant necessarias per ademplir sias incumbensas. El stizza las unitads da datas ch'el na dovra betg pli. Datas betg correctas vegnan curregidas u stizzadas immediatamain; resalvà resta l'artitgel 44 alinea 2.

⁵ Il post intern per la garanzia da qualidad dal SIC ademplescha las suandantas incumbensas:

- a. controllar las datas da persunas en il sistem IASA-GEX SIC (art. 50) areguard lur relevanza ed areguard lur correctadad;
- b. controllar periodicamain ils rapports da las autoritads executivas chantunalas ch'èn registrads en il sistem INDEX SIC (art. 51) areguard lur relevanza ed areguard lur correctadad;
- c. controllar en tut ils sistems d'infurmazion dal SIC en furma d'emprovas da controlla la legitimitad, l'adequatezza, l'efficacitad e la correctadad da las elavuraziuns da datas;
- d. stizzar datas en il sistem INDEX SIC che derivan da scleriments preliminars dals chantuns e ch'èn vegnidas elavuradas l'ultima giada avant passa 5 onns, sco er datas ch'il chantun dumonda da stizzar;
- e. procurar per scolaziuns internas dals collavuraturs dal SIC davart dumondas da la protecziun da datas.

Art. 46 Elavuraziun da datas en ils chantuns

¹ Las autoritads executivas chantunalas na mainan naginas atgnas collecziuns da datas applitgond questa lescha.

² Sch'ils chantuns elavuran datas en atgna cumpetenza, procuran els che las datas chantunalas na cuntegnian natinas infurmaziuns davart l'existenza e davart il cuntegn da las datas da la Confederaziun.

³ Las autoritads executivas chantunalas dastgan dar vinavant giudicaments da la situaziun e datas ch'ellas han survegnì dal SIC, sche quai è necessari per giuditgar mesiras per proteger la segirezza u per impedir ina periclitaziun considerabla. Il Cussegl federal regla a tge posts che questas datas dastgan vegnir surdadas ed en tge dimensiu che quai è admess.

2. secziun Sistems d'infurmaziun per las activitads infurmativas

Art. 47 Sistems d'infurmaziun dal SIC

¹ Per ademplir sias incumbensas tenor l'artitgel 6 maina il SIC ils suandants sistems d'infurmaziun:

- a. IASA SIC (art. 49);
- b. IASA-GEX SIC (art. 50);
- c. INDEX SIC (art. 51);
- d. GEVER SIC (art. 52);
- e. PES (art. 53);
- f. portal OSINT (art. 54);
- g. Quattro P (art. 55);
- h. ISCO (art. 56);
- i. sistem d'arcun da datas restantas (art. 57).

² Il Cussegl federal regla per mintga sistem d'infurmaziun dal SIC:

- a. il catalog da las datas da persunas;
- b. las cumpetenzas tar l'elavuraziun da datas;
- c. ils dretgs d'access;
- d. la frequenza da la garanzia da qualitad, resguardond la grevezza da l'intervenziun en ils dretgs constituziunals che vegn chaschunada tras l'elavuraziun da datas;
- e. la durada che las datas vegnan tegnidás en salv, resguardond ils basegns specifics dal SIC areguard ils champs d'incumbensas respectivs;
- f. l'extincziun da las datas;
- g. la segirezza da las datas.

Art. 48 Attribuziun da las datas als sistems d'infurmaziun

Il SIC attribuescha las datas ch'entran sco suonda:

- a. las datas cun infurmaziuns davart extremissem violent: al sistem IASA-GEX SIC;
- b. las datas cun infurmaziuns che chaschunan sulettamain process administratifs: al sistem GEVER SIC;
- c. las datas cun infurmaziuns che pertutgan exclusivamain mesiras da la polizia da segirezza: al sistem PES
- d. las datas che derivan da funtaunas publicas: al sistem dal portal OSINT;
- e. las datas da controllas da cunfins e da duana: al sistem Quattro P;
- f. las datas che servan sulettamain per controllar las incumbensas e per diriger l'exploraziun via radio e via cabel: al sistem ISCO;
- g. las ulteriuras datas: al sistem d'arcun da datas restantas.

Art. 49 IASA SIC

¹ Il sistem d'analisa integral dal SIC (IASA SIC) serva ad evaluar datas dal puntg da vista da l'infurmaziun.

² El cuntegna datas che pertutgan ils champs d'incumbensas tenor l'artitgel 6 alinea 1, cun excepcziun da las datas davart l'extremissem violent.

³ Ils collavuratur dal SIC ch'en incumbensads cun la registraziun, cun la retscher-tga, cun l'evaluaziun e cun la garanzia da qualitad da las datas han en la procedura d'invista in access al sistem IASA SIC. Cun agid dad IASA SIC pon els far retschertgas da datas en tut ils sistems d'infurmaziun dal SIC, per ils quals els han l'autorisaziun d'access.

Art. 50 IASA-GEX SIC

¹ Il sistem d'analisa integral dal SIC pertutgant l'extremissem violent (IASA GEX SIC) serva a la registraziun, a l'elavuraziun ed a l'evaluaziun d'infurmaziuns che pertutgan l'extremissem violent.

² El cuntegna las datas che pertutgan l'extremissem violent.

³ Ils collavuratur dal SIC ch'en incumbensads cun la registraziun, cun la retscher-tga, cun l'evaluaziun e cun la garanzia da qualitad da las datas han en la procedura d'invista in access al sistem IASA-GEX SIC.

Art. 51 INDEX SIC

¹ Il sistem d'infurmaziun INDEX SIC serva:

- a. a constatar, sch'il SIC elavura datas davart ina persuna, in'organisaziun, ina gruppaziun, in object u in eveniment;
- b. ad archivar ils rapports che las autoritads executivas chantunalas han fatg;

- c. ad elavurar datas da scleriments preliminars da las autoritads executivas chantunalas.

² El permetta a las autoritads che n'èn betg colliadas cun la rait spezialmain segira dal SIC l'access a las datas ch'ellas dovràn per ademplir lur incumbensas legalas e la transmissiun segira da quellas.

³ El cuntegna:

- a. las datas per identifitgar las persunas, las organisaziuns, las gruppaziuns, ils objects ed ils eveniments ch'èn registrads en ils sistems d'infurmaziun IASA SIC ed IASA-GEX SIC;
- b. ils rapports che las autoritads executivas chantunalas han fatg autonomamain u per incumbensa dal SIC;
- c. las datas da scleriments preliminars da las autoritads executivas chantunalas.

⁴ Las suandardas persunas han en la procedura d'invista access a las suandardas datas en INDEX SIC:

- a. ils collauraturts dal SIC a las datas tenor l'alinea 3 literas a e b, sch'els èn incumbensads da scuuvrir a temp e d'impeditr smanatschas per la Svizra e per sia populaziun;
- b. ils collauraturts da las autoritads executivas chantunalas per ademplir lur incumbensas tenor questa lescha sco er per elavurar e per transmetter lur datas da scleriments preliminars e lur rapports al SIC ed ad autres autoritads executivas chantunalas; access a las datas tenor l'alinea 3 litera c han exclusivamain ils collauraturts da l'autoritat executiva chantunala che ha fatg ils scleriments preliminars sco er ils collauraturts dal post per la garanzia da qualitat dal SIC;
- c. ils collauraturts da l'Uffizi federal da polizia a las datas tenor l'alinea 3 litera a per ademplir incumbensas da la polizia da segirezza, da la polizia criminala e da la polizia administrativa sco er per examinar cas da suspect da lavada da daners suspectus e da finanziaziun da terrorissem en cas d'annunzias d'instituts da finanzas svizzers;
- d. ils collauraturts dal post da servetsch dal DDPS, ch'è cumpetent per la segirezza da las infurmaziuns e dals objects, a las datas tenor l'alinea 3 litera a per far controllas da segirezza relativas a persunas.

Art. 52 GEVER SIC

¹ Il sistem d'infurmaziun per l'administraziun da las fatschentas dal SIC (GEVER SIC) serva ad elavurar ed a controllar las fatschentas sco er a garantir andaments da lavur effizients.

² El cuntegna:

- a. las datas da fatschentas administrativas;
- b. tut ils products informativs ch'il SIC trametta a l'exterior;

- c. las datas ch'èn vegnidas duvradas per furmar ils cuntegns tenor las literas a e b;
- d. las infurmaziuns ch'èn necessarias per la controlla da las fatschentas en spezial en il sectr da las controllas da segirezza relativas a persunas.

3 Ils collavuraturs dal SIC han en la procedura d'invista access a GEVER SIC.

Art. 53 PES

1 Il sistem d'infurmazion per la preschentazion electronica da la situaziun (PES) serva a las autoritads cumpetentas da la Confederaziun e dals chantuns sco instrument directiv e per derasar infurmaziuns en vista a la direcziun ed a la realisaziun da mesiras da la polizia da segirezza, en spezial en cas d'evenimenti, nua ch'i vegnan temids acts da violenza.

2 El cuntegna datas davart evenimenti e davart mesiras per proteger la segirezza interna u externa.

3 Ils collavuraturs dal SIC e da las autoritads cumpetentas da la Confederaziun e dals chantuns ch'èn incumbensads cun la direcziun da la politica da segirezza u cun la valitaziun u cun il dumogn d'evenimenti ch'èn relevantes per la situaziun han en la procedura d'invista in access al PES.

4 En cas d'evenimenti po il SIC er permetter a posts privats ed ad autoritads da polizia e da segirezza da l'exterior en la procedura d'invista in access ch'è limità temporalmain. L'access è restrenschì a quellas datas dal sistem che questi posts e questas autoritads dovràn per ademplir lur incumbensa en connex cun il dumogn d'in tal eveniment.

Art. 54 Portal OSINT

1 Il portal «Open Source Intelligence» (portal OSINT) serva al SIC per metter a disposiziun datas da funtaunas publicas.

2 El cuntegna datas che resultan da l'utilisaziun da funtaunas publicas.

3 Ils collavuraturs dal SIC han en la procedura d'invista access al portal OSINT.

4 Als collavuraturs da las autoritads executivas chantunalas poi vegnir permess en la procedura d'invista in access a tschertas datas dal portal OSINT.

Art. 55 Quattro P

1 Il SIC po manar in sistem d'infurmazion (Quattro P) che serva ad identifitgar tschertas categorias da persunas estras ch'entran en Svizra u che partan da la Svizra sco er per constatar las datas da l'entrada e da la partenza.

2 El cuntegna datas che resultan tar ils posts da cunfin en il rom da controllas da cunfin e da duana e che servan ad identifitgar las persunas e lur viadis.

3 Ils collavuraturs dal SIC che han l'incumbensa d'identifitgar persunas en connex cun l'adempliment da las incumbensas tenor l'artitgel 6, han en la procedura d'invista in access a Quattro P.

⁴ Il Cussegħ federal fixescha per Quattro P en ina glista betg publica las categorias da las persunas che ston vegnir registradas; el s'orientescha en quest connex vi da la situaziun da smanatscha actuala.

Art. 56 ISCO

¹ Il sistem d'infurmazijun per l'exploraziun da la communicaziun (ISCO) serva a controllar ed a diriger l'exploraziun via radio e via cabel.

² El cuntegna datas per diriger ils medis d'exploraziun sco er per controllar e per rapportar.

³ Ils collavuraturi dal SIC ch'èn incumbensads cun la direcziun da l'exploraziun via radio e via cabel han en la procedura d'invista in access al sistem ISCO.

Art. 57 Sistem d'arcun da datas restantas

¹ Il sistem d'arcun da datas restantas serva ad archivar las datas che na pon betg vegnir attribuidas tenor l'artitgel 48 directamain ad in auter sistem.

² Sche infurmaziuns che entran e che ston vegnir archivadas en il sistem d'arcun da datas restantas cuntegnan datas da persunas, vegn il giudicament da la relevanza e da la correctedad tenor l'artitgel 45 alinea 1 fatg per las infurmaziuns sco talas e betg mo per las singulas datas da persunas. In giudicament en il cas singul vegn fatg, sche las datas da persunas vegnan transferidas en in auter sistem d'infurmazijun.

³ Ils collavuraturi dal SIC ch'èn incumbensads cun la registraziun, cun la retscher-tga, cun l'evaluaziun e cun la garanzia da qualitad da las datas han en la procedura d'invista in access al sistem d'arcun da datas restantas.

⁴ La durada da conservaziun maximala da las datas importa 10 onns.

3. seċċiun

Datas che derivan da mesiras da procuraziun suttamessas ad in'utorisazjuni

Art. 58

¹ Il SIC arcunescha las datas che derivan da mesiras da procuraziun suttamessas ad in'utorisazjuni tenor l'artitgel 26 cas per cas ed en moda separada dals sistems d'infurmazijun tenor l'artitgel 47.

² El procura che las datas da persunas che derivan da mesiras da procuraziun ch'èn suttamessas ad in'utorisazjuni e che n'hant nagin connex cun la situaziun da smanatscha specifica na vegnan betg duvradas e vegnan stizzadas il pli tard 30 dis suenter la terminaziun da la mesira.

³ Sche la mesira da procuraziun suttamessa ad in'autorisaziun pertutga ina persuna che tutga tar ina da las gruppas professinalas che veggan numnadas en ils artitgels 171–173 CPP²⁰, veggan las datas che n'han nagin connex cun la situazion da smannatscha specifica separadas e stizzadas sut la direcziun²¹ dal Tribunal administrativ federal. Sche la mesira da procuraziun suttamessa ad in'autorisaziun pertutga in'autra persuna, ston las datas, per las qualas ina persuna ha il dretg da refusar da dar perditga tenor ils artitgels 171–173 CPP, medemamain veggir stizzadas.

⁴ En il cas singul ed observond l'artitgel 5 alineas 5–8 po el archivar datas da persunas supplementarmain en il sistem d'infurmazion ch'è previs per quai tenor l'artitgel 47 alinea 1, sche quellas cuntengnan infurmaziuns che veggan duvradas per adempilir las incumbensas tenor l'artitgel 6 alinea 1.

⁵ Ils collavuratur dal SIC ch'èn incumbensads cun la realisaziun d'ina mesira da procuraziun e cun l'evaluaziun dals resultats han en la procedura d'invista in access a las datas correspundentas.

⁶ Il Cussegl federal regla:

- a. il catalog da las datas da persunas;
- b. ils dretgs d'elavuraziun e d'access;
- c. la durada da la conservaziun da las datas e la procedura per stizzar las datas;
- d. la segirezza da las datas.

4. secziun Disposiziuns spezialas davart la protecziun da datas

Art. 59 Examinaziun avant la publicaziun

Il SIC examinescha avant mintga communicaziun da datas da persunas u da products che las datas da persunas correspundian a las prescripzions giuridicas tenor questa lescha e che la communicaziun saja previsa giuridicamain e necessaria en il cas concret.

Art. 60 Communicaziun da datas da persunas ad autoritads svizras

¹ Il SIC communitegescha datas da persunas ad autoritads svizras, sche quai è necessari per proteger la segirezza interna ed externa. Il Cussegl federal designescha las autoritads respectivas.

² Sche enconuschienschas dal SIC servan ad autres autoritads per realisar la persecuzion penala, per impedir delicts grevs u per proteger l'urden public, metta il SIC a disposiziun quellas senza veggir intimà u sin dumonda mantegnend la protecziun da la funtauna.

²⁰ SR 312.0

²¹ Rectifitgà da la Cumissiun da redacziun da l'Assamblea federala (art. 58 al. 1 LParl; SR 171.10).

³ Il SIC communitygescha datas che derivan da mesiras da procuraziun suttamessas ad in'autorisaziun adina ad in'autoritat da persecuziun penal, sch'ellas cuntegnan indizis concrets per in delict, per il qual l'autoritat da persecuziun penal dastgass ordinar ina mesira cumparegliabla da la procedura penal per l'intent da perseguitar quel.

⁴ Il SIC inditgescha l'origin da las datas a las autoritads da persecuziun penal. L'ulteriura procedura sa drizza tenor il CPP²² u tenor la Procedura penal militara dals 23 da mars 1979²³.

Art. 61 Communicaziun da datas da persunas ad autoritads da l'exterier

¹ Il SIC po communitygar datas da persunas u glistas da datas da persunas a l'exterier. Avant mintga communicaziun examinescha el, sche las premissas giuridicas per la communicaziun èn ademplidas.

² Sche la legislaziun dal stadi che retschaiva las datas na garantescha nagina protecziun da datas adequata, pon vegnir communitygadas datas da persunas a quest stadi – en divergenza da l'artitgel 6 alinea 2 da la Lescha federala dals 19 da zercladur 1992²⁴ davart la protecziun da datas (LPD) – mo, sche la Svizra tgira relaziuns diplomaticas cun quel ed ina da las suandantas premissas è ademplida:

- a. la Svizra è obligada da communitygar ad el las datas da persunas sin fundamennt d'ina lescha u d'in contract internaziunal;
- b. quai è necessari per proteger in interess da segirezza public predominant da la Svizra u dal stadi che retschaiva las datas da persunas sco per impedir u per sclerir in delict grev ch'è chastiabel er en Svizra;
- c. quai è necessari per motivar ina dumonda da la Svizra per infurmaziuns;
- d. quai è en l'interess da la persuna pertutgada e quella ha dà ses consentiment ordavant u ses consentiment po vegnir supponi cleramain tenor las circumanstanzas;
- e. quai è necessari per proteger il corp e la vita da terzas persunas.

³ En il cas singul po il SIC communitygar datas da persunas a stadis, cun ils quals la Svizra tgira relaziuns diplomaticas, sch'il stadi petent garantescha en scrit da disponer dal consentiment da la persuna pertutgada, e sche questas datas permettan al stadi petent da giuditgar, sche la persuna pertutgada po cooperar a projects da l'exterier classifitgads en il sectur da la segirezza interna u externa u survegnir access ad infurmaziuns, a materialias u ad installaziuns da l'exterier classifitgadas.

⁴ El po communitygar en la procedura d'invista datas da persunas ad organs da segirezza da l'exterier, dals quals ils stadis garanteschan in nivel da protecziun da datas adequat e cun ils quals la Svizra ha fatg in contract tenor l'artitgel 70 alinea 3.

²² SR 312.0

²³ SR 322.1

²⁴ SR 235.1

⁵ Las datas da persunas na dastgan betg vegnir communitgadas ad in organ da segrezzia da l'exteriur, sche la persuna pertutgada è exponida tras quai al privel d'in chasti dubel ubain a dischavantatgs serius per il corp e per la vita en il senn da la Convenzun dals 4 da november 1950²⁵ per la proteczion dals dretgs umans u d'autras cunvegas internaziunalas ch'èn vegnidias ratifitgadas da la Svizra.

⁶ Sche las datas da persunas vegnan duvradas en ina procedura giuridica, valan las disposiziuns decisivas davart l'assistenza giudiziala.

Art. 62 Communicaziun da datas da persunas a terzas persunas

La communicaziun da datas da persunas a terzas persunas è admissibla mo, sche:

- a. la persuna pertutgada ha dà ses consentiment en chaussa u sche la communicaziun è senza dubi en l'interess da la persuna pertutgada;
- b. la communicaziun è necessaria per impedir in grond privel direct;
- c. la communicaziun è necessaria per motivar ina dumonda d'infurmazion.

Art. 63 Dretg da survegnir infurmaziuns

¹ Il dretg da survegnir infurmaziuns concernent ils sistems d'infurmazion PES, portal OSINT e Quattro P, concernent las datas administrativas en GEVER SIC sco er concernent las datas en ils sistems d'arcunaziun tenor ils artitgels 36 alinea 5 e 58 sa drizza tenor la LPD²⁶.

² Sch'ina persuna pretenda infurmaziuns davart la dumonda, sch'il SIC elavurescha datas davart ella en ils sistems d'infurmazion IASA SIC, IASA-GEX SIC, INDEX SIC, ISCO ed en il sistem d'arcun da datas restantas sco er en las datas d'infurmazion da GEVER SIC, suspenda il SIC questa infurmazion:

- a. sche ed uschenavant ch'i dat interess predominants concernent las datas elavuradas ch'èn motivads en las actas per tegnair secret quellas en connex cun:
 - 1. l'adempilment d'ina incumbensa tenor l'artitgel 6, u
 - 2. ina persecuzion penala u in'autra procedura d'inquisizion;
- b. sche ed uschenavant che quai è necessari pervia d'interest predominants da terzas persunas; u
- c. sch'i na vegnan betg elavuradas datas davart la persuna petenta.

³ Il SIC communitgescha a la persuna petenta la suspensiun da l'infurmazion e la renviescha al fatg, ch'ella haja il dretg da pretendre da l'incumbensà federal per la proteczion da datas e per la transparenza (IFPDT), ch'el examineschia, sche eventualas datas vegnian elavuradas en moda legala e sche interest da tegnair secret predominants giustifitgeschian la suspensiun.

⁴ Uschespert ch'i na dat pli nagins interest da tegnair secret, il pli tard dentant suenter che la durada da conservaziun è scadida, dat il SIC infurmaziuns a la persuna petenta tenor la LPD, nun che quai saja cumbinà cun lavur sproporzionada.

²⁵ SR **0.101**

²⁶ SR **235.1**

⁵ Persunas, da las qualas n'èn vegnidas elavuradas naginas datas, infurmescha il SIC davart quest fatg il pli tard 3 onns suenter che lur dumonda è entrada.

Art. 64 Examinaziun tras il IFPDT

¹ Il IFPDT fa l'examinaziun tenor l'artitgel 63 alinea 3 sin dumonda da la persuna petenta.

² El communityescha a quella ubain ch'i na vegnian betg elavuradas illegalmain datas davart ella ubain ch'el haja drizzà al SIC ina recumandaziun en il senn da l'artitgel 27 LPD²⁷ per eliminar sbagls ch'el haja constatà tar l'elavuraziun da las datas u concernent la suspensiun da l'infurmazion.

³ El renda attent la persuna petenta ch'ella possia pretender dal Tribunal administrativ federal d'examinar questa communicaziun ubain l'execuziun da la recumandaziun.

⁴ Per la recumandaziun tenor l'alinea 2 vala l'artitgel 27 alineas 4–6 LPD confurm al senn.

⁵ Sche la persuna petenta preschenta en moda vardaivla ch'ella haja in donn considerabel ed irreparabal pervia da la suspensiun d'ina infurmazion, po il IFPDT recumandar al SIC da dar excepiunalmain immediatamain infurmaziuns, nun ch'i resultia da quai ina periclitaziun da la segirezza interna u externa.

Art. 65 Examinaziun tras il Tribunal administrativ federal

¹ Sin dumonda da la persuna petenta fa il Tribunal administrativ federal l'examinaziun tenor l'artitgel 64 alinea 3 e la communityescha suenter, ch'el haja fatg quella.

² Sch'igl ha dà sbagls tar l'elavuraziun da las datas ubain concernent la suspensiun da l'infurmazion, drizza il Tribunal administrativ federal ina disposiziun al SIC per eliminar quels. Il medem vala, sche la recumandaziun dal IFPDT na vegn betg observada. Quel po far recurs cunter questa disposiziun tar il Tribunal federal.

Art. 66 Furma da la communicaziun ed exclusiun dals meds legals

¹ Las communicaziuns tenor ils artitgels 63 alinea 3, 64 alinea 2 e 65 alinea 1 vegnan adina formuladas da maniera identica e na vegnan betg motivadas.

² Ellas na pon betg vegnir contestadas da las persunas pertutgadas cun meds legals.

Art. 67 Excepziun dal princip da transparenza

La Lescha federala dals 17 da december 2004²⁸ davart il princip da la transparenza da l'administraziun na vala betg per l'access a documents uffizials concernent la procuraziun d'infurmaziuns tenor questa lescha.

²⁷ SR 235.1

²⁸ SR 152.3

5. secziun Archivaziun

Art. 68

¹ Il SIC porscha las datas e las actas che na vegnan betg pli duvradas u che vegnan eliminadas a l'Archiv federal per l'archivaziun. L'Archiv federal archivescha las datas e las actas dal SIC en locals spezialmain segirs. Ellas èn su ttamessas ad in temp da protecziun da 50 onns.

² Il Cussegl federal po prolungar il temp da protecziun per archivalias che derivan da servetschs da segirezza esters tenor l'artitgel 12 da la Lescha federala dals 26 da zer-cladur 1998²⁹ davart l'archivaziun pliras giadas per in temp limità, sch'il servetsch da segirezza ester pertutgà fa valair resalvas cunter in'eventuala invista.

³ En il cas singul po il SIC prender invista – durant il temp da protecziun – da datas da persunas ch'el ha surdà a l'Archiv federal per l'archivaziun, e quai per valitar smanatschas concretas da la segirezza interna u externa ubain per proteger in auter interess public predominant.

⁴ El eliminatescha las datas e las actas ch'il Tribunal federal ha designà sco betg degnas da vegnir archivadas.

5. chapitel Prestaziuns

Art. 69

¹ Sch'igl exista in interess d'infurmaziun u in auter interess public, po il SIC furnir prestaziuns a favur d'autras autoritads da la Confederazion e dals chantuns en spezial en ils suustants secturs:

- a. transmission segira;
- b. transport da rauba u da persunas;
- c. cussegliaziun e giudicament da la situazion;
- d. protecziun e defensiun d'attatgas sin l'infrastructura d'infurmaziun u da communicaziun u sin il mantegniment dal secret.

² Sch'igl exista in interess d'infurmaziun, po il SIC furnir talas prestaziuns er a favur da terzas parts en Svizra u a l'exterior.

²⁹ SR 152.1

6. chapitel Direcziun politica, controlla e protecziun giuridica

1. secziun Direcziun politica e scumonds

Art. 70 Direcziun politica tras il Cussegl federal

¹ Il Cussegl federal procura per la direcziun politica dal SIC ed ademplescha en quest connex en spezial las suandardas incumbensas:

- a. conceder al SIC l'incarica da basa e renovar tala almain mintga 4 onns; l'incarica da basa è secreta;
- b. approvar annualmain la glista d'observaziun tenor l'artitgel 72 e tramerter questa glista a la DelCG; la glista d'observaziun è confidenziala;
- c. determinar annualmain las gruppaziuns che ston vegnir consideradas sco extremisticas violentas e prender enconuschientscha dal dumber d'extremists violentes che na pon anc vegnir attribuidas a naginas gruppaziuns enconuschentas;
- d. giuditgar annualmain e – sche necessari – en cas d'eveniments spezialis la situaziun da smanatscha ed infurmarr las Chombras federalas e la publicidad;
- e. ordinar las mesiras necessarias en cas da situaziuns da smanatscha spezialas;
- f. fixar annualmain la collavuraziun dal SIC cun autoritads estras.

² Ils documents en connex cun las incumbensas tenor l'alinea 1 n'èn betg accessibels al public.

³ Il Cussegl federal po concluder en moda autonoma contracts internaziunals davart la collavuraziun internaziunala dal SIC concernent la protecziun d'infurmaziuns u concernent la participaziun a sistems d'infurmaziun internaziunals automatisads tenor l'artitgel 12 alinea 1 litera e.

Art. 71 Protecziun d'ulteriurs interess impurtants da la Svizra

¹ En cas d'ina smanatscha greva ed imminentia po il Cussegl federal incumbensar il SIC da prender mesiras tenor questa lescha, sche quellas èn necessarias per proteger ulteriurs interess impurtants da la Svizra tenor l'artitgel 3.

² El fixescha en il cas singul la durada, l'intent, il gener e la dimensiun da la mesira.

³ En cas da mesiras da procuraziun suttamessas ad in'autorisaziun sto vegnir observada la procedura d'approvaziun tenor ils artitgels 26–33.

⁴ Sch'il Cussegl federal dat ina incumbensa tenor l'alinea 1, infurmescha el entaifer 24 uras la DelCG en chaussa.

Art. 72 Glista d'observaziun

¹ La glista d'observaziun cuntegna organisaziuns e gruppaziuns, tar las qualas i dat in motiv da supponer ch'ellas periclitescian la segirezza interna u externa.

² La supposiziun vala sco motivada, sch'ina organisaziun u gruppaziun figurescha sin ina glista da las Naziuns Unidas u da l'Uniu europeica; en quest cas po questa organisaziun u gruppaziun veginr messa sin la glista d'observaziun.

³ In'organisaziun u gruppaziun vegn strigtgada da la glista d'observaziun, sche:

- a. nagins motivs na laschan pli supponer ch'ella periclitescchia la segirezza interna u externa; u
- b. ella na figurescha pli sin naginas glistas tenor l'alinea 2 ed i n'existan nagins motivs particulars ch'ella periclitescchia la segirezza interna u externa.

⁴ En in'ordinaziun fixescha il Cussegl federal ils criteris che servan a stabilir la glista d'observaziun ed entaifer tge intervals che la glista vegn verifitgada.

Art. 73 Scumond d'activitads

¹ Il Cussegl federal po scumandar ad ina persuna natirala ubain ad in'organisaziun u gruppaziun da pratitgar in'activitat che periclitescchia concretamain la segirezza interna u externa e che serva directamain u indirectamain a propagar, a sustegnair u a promover en autra moda activitads terroristicas u l'extremissem violent.

² In scumond po vegnir pronunzià per maximalmain 5 onns. Sche las premissas èn anc adina ademplidas suenter la scadenza da quest temp, po il scumond vegnir prolongà per maximalmain 5 ulteriurs onns.

³ Il departament che ha fatg la dumonda da scumandar l'activitat examinescha regularmain, sche las premissas èn anc ademplidas. Sche quai n'è betg pli il cas, propona el al Cussegl federal d'abolir il scumond.

Art. 74 Scumond d'organisaziuns

¹ Il Cussegl federal po scumandar in'organisaziun u ina gruppaziun che propaghe-scha, sustegna e promova en autra moda directamain u indirectamain activitads terroristicas u l'extremissem violent e periclitescchia uschia concretamain la segirezza interna u externa.

² In scumond sa basa sin in conclus correspondent da las Naziuns Unidas u da l'Organisaziun per la segirezza e la collauraziun en l'Europa; il Cussegl federal consultescha las cumissiuns ch'en cumpetentas per la politica da segirezza.

³ In scumond po vegnir pronunzià per maximalmain 5 onns. Sche las premissas èn anc adina ademplidas suenter la scadenza da quest temp, po il scumond vegnir prolongà per maximalmain 5 ulteriurs onns.

⁴ Tgi che – sin territori svizzer – sa participescha ad ina gruppaziun u ad in'organisaziun ch'è scumandada tenor l'alinea 1, la sustegna persunalmain u materialmain, organisescha per ella u per sias finamiras acziuns da propaganda, recrutescha per ella u promova sias activitads en autra moda e maniera, vegn, nun ch'i vegnian apligtgadas disposiziuns penales pli severas, chastià cun in chasti d'empraschunament fin a 3 onns u cun in chasti pecuniar.

⁵ Chastiabel è er tgi che commetta il malfatg a l'exterior, sch'el vegn arrestà en Svizra e sch'el na vegn betg extradi. L'artitgel 7 alineas 4 e 5 CP³⁰ è applitgabel.

⁶ Las disposiziuns generalas dal Cedesch penal davart la confiscaziun da valurs, en spezial ils artitgels 70 alinea 5 e 72 èn applitgablas.

⁷ Las autoritads competentas communitgeschan tut las sentenzias, tut las decisiuns penalaes e tut ils conclus da sistida immediatamain, gratuitamain e cumplettamain a la procura publica federala, al SIC ed a l'Uffizi federal da polizia.

2. secziun **Controlla e surveglianza dal SIC**

Art. 75 Autocontrollo dal SIC

Il SIC garantescha cun mesiras adattadas per seguir la qualitat e da controlla che l'execuziun confirma al dretg da questa lescha è garantida tant entaifer il SIC sco er tar las autoritads da segirezza dals chantuns.

Art. 76 Autoritat independenta da surveglianza

¹ Il Cussegl federal nominescha in'autoritat independenta per surveglier il SIC.

² El elegia il manader da l'autoritat independenta da surveglianza sin proposta dal SIC per ina perioda d'uffizi da 6 onns.

³ Il manader vala sco elegì per in'ulteriura perioda d'uffizi, nun ch'il Cussegl federal decreteschia il pli tard 6 mais avant la scadenza da la perioda d'uffizi che quella na vegnia betg prolongada per motivs objectivs sufficients.

⁴ Resguardond in termin da 6 mais po il manader dumandar il Cussegl federal sia relaschada sin la fin d'in mais.

⁵ El po vegnir suspendì dal Cussegl federal da ses uffizi avant la scadenza da la perioda d'uffizi, sch'el:

- a. ha violà sapientivamain u per greva negligentscha en moda greva las obligaziuns d'uffizi; u
- b. ha pers a lunga vista la qualificaziun d'ademplir ses uffizi.

Art. 77 Posiziun da l'autoritat independenta da surveglianza

¹ L'autoritat independenta da surveglianza exequescha sia funcziun en moda autonoma; ella na sto betg observar instrucziuns. Administrativamain fa ella part dal DDPS.

² Ella ha in agen preventiv. Ella engascha sezza ses personal.

³ Ella sa constituescha sezza. Ella regla sia organisaziun e sias metodas da lavur en in urden da gestiun.

⁴ La relaziun da lavour dal manader sco er dal personal da l'autoritat independenta da surveglianza sa drizza tenor la Lescha dals 24 da mars 2000³¹ davart il personal da la Confederaziun. Il manader n'è betg suuttamess al sistem da giudicat tenor l'artitgel 4 alinea 3 da la Lescha davart il personal da la Confederaziun.³²

Art. 78 Incumbensas, recumandaziuns e dretgs da survegnir infurmaziuns da l'autoritat da surveglianza

¹ L'autoritat independenta da surveglianza surveglia l'activitat infurmativa dal SIC, da las autoritads executivas dals chantuns sco er da las terzas personas e d'auters uffizis incumbensads dal SIC. Ella controlla, sche las activitads èn legalas, adequatas ed efficazias.

² Ella coordinescha sia activitat cun las activitads da surveglianza parlamentaras sco er cun ils auters posts da surveglianza da la Confederaziun e dals chantuns.

³ Ella infurmescha il DDPS davart sia activitat en in rapport annual; quest rapport vegn publitgà.

⁴ Ella ha access a tut las infurmaziuns utilas ed a tut ils documents utils sco er a tut las localitads dals posts survegliads. Ella po pretender copias dals documents. En il rom da sia activitat da surveglianza po ella pretender infurmaziuns e l'invista da las actas d'auters posts da la Confederaziun e dals chantuns, uschenavant che questas infurmaziuns han in connex cun la collavuraziun da quests posts cun ils posts survegliads.

⁵ Per ademplir sia activitat da surveglianza po ella acceder a tut ils sistems d'infurmaziun ed a tut las collecziuns da datas dals posts survegliads; ella po er acceder a datas personalas spezialmain sensiblas. Las datas retschertgadas en quest connex dastga ella arcunar mo fin che la controlla è terminada. Ils access a las differentas collecziuns da datas ston vegnir protocollads dal possessur da la collecziun da datas respectiva.

⁶ L'autoritat independenta da surveglianza communitygescha al DDPS en scrit il resultat da sias controllas. Ella po far recumandaziuns.

⁷ Il DDPS procura che las recumandaziuns vegnian realisadas. Sch'il DDPS refusa ina recumandaziun, suuttametta el quella al Cussegl federal per laschar decider en chaussa.

Art. 79 Instanza independenta da controlla per l'exploraziun via radio e via cabel

¹ Ina instanza independenta da controlla entaifer l'administraziun verifitgescha, sche l'exploraziun via radio è legala e surveglia l'execuziun da las incumbensas d'exploraziun via cabel approvadas e deliberadas. Ella exequescha sias incumbensas senza stuair observar instrucziuns. Il Cussegl federal elegia ses commembres.

³¹ SR 172.220.1

³² La rectificaziun da la Cumissiun da redacziun da la AF dals 12 da mars 2020, publitgada ils 24 da mars 2020, concerna mo il text franzos (AS 2020 1057).

² L'instanza da controlla verifitgescha las incumbensas che vegnan dadas al servetsch che fa l'exploraziun sco er l'elavuraziun ed il transferiment da las infurmaziuns che quel ha registrà. Per quest intent survegn ella dals posts cumpetents l'access a tut las infurmaziuns utilas ed a tut ils stabiliments.

³ Sin basa da la controlla po ella dar recumandaziuns e pretender tar il DDPS che incumbensas d'exploraziun via radio vegnian sistidas e che infurmaziuns vegnian stizzadas. Sias recumandaziuns, sias pretensiuns e ses rapports n'en betg publics.

⁴ Il Cussegl federal regla la cumposiziun e l'organisaziun da l'instanza da controlla, l'indemnisaziun da ses commembres sco er l'organisaziun da ses secretariat. La perioda d'uffizi importa 4 onns.

Art. 80 Surveglianza e controlla tras il Cussegl federal

¹ Il DDPS orientescha regularmain il Cussegl federal davart la situaziun da smanatscha e davart las activitads dal SIC.

² Il Cussegl federal regla:

- a. la surveglianza da las finanzas da quels champs d'activitat dal SIC ch'en suuttamess ad ina discrezion spezial;
- b. las pretensiuns minimalas a las controllas en ils chantuns e las cumpetenzas dals organs da surveglianza da la Confederaziun.

³ Cunvegnaas administrativas internaziunalas che vegnan fatgas dal SIC, che cumpligan ina perioda pli lunga, che han consequenzas finanziyalas substanzialas u da las qualas il Cussegl federal stuess avair enconuschiantscha per motivs giuridics u politics, ston vegnir approvadas dal Cussegl federal. La resalva d'approvaziun vala er per cunvegnaas che na vegnan betg fixadas en scrit. Las cunvegnaas dastgan vegnir exequidas pir suenter ch'ellas en vegnidias approvadas.

⁴ Il DDPS orientescha il Cussegl federal e la DelCG annualmain u tenor basegn davart l'intent ed il dumber da las identitads da finta che vegnan applitgadas dals collauraturs dal SIC u dals organs da segirezza dals chantuns. Il dumber dals documents d'identitat emess da nov sto vegnir cumprovà separadamain.

⁵ Il Cussegl federal orientescha la DelCG annualmain e tenor basegn davart scumonds d'activitads e davart ils resultats da la controlla regulara tenor l'artitgel 73 alinea 3 sco er davart scumonds d'organisaziuni.

Art. 81 Surveglianza suprema parlamentara

¹ La surveglianza suprema parlamentara da l'activitat dal SIC e dals organs executifs dals chantuns che ageschan per incumbensa da la Confederaziun per exequir questa lescha è – tut tenor ils secturs da cumpetenza respectivs – chaussa da la DelCG e da la Delegaziun da finanzas a norma da la Lescha dal parlament dals 13 da decembre 2002³³.

³³ SR 171.10

² Ils organs da surveglianza parlamentars chantunals pon controllar l'execuziun tenor l'artitgel 85 alinea 1.

Art. 82 Surveglianza chantunala

¹ Collavuratur da las autoritads executivas chantunals ch'èn incaricads dals chantuns cun incumbensas tenor questa lescha sustattattan al dretg da lavur chantunal ed a la surveglianza ierarchica chantunala da lur superiurs.

² La surveglianza ierarchica en ils chantuns è chaussa da quels posts, als quals l'organ executiv chantunal respectiv è suittamess. Per sustegnair la surveglianza ierarchica pon quels posts installar in organ da controlla ch'è separà da l'organ executiv chantunal e che sto dar pled e fatg als posts superiurs.

³ Per sias controllas survegn la surveglianza chantunala ina glista da las incumbensas dadas dal SIC sco er la glista d'observaziun tenor l'artitgel 72.

⁴ La surveglianza ierarchica chantunala po prender invista da las datas ch'il chantun elavura per incumbensa da la Confederaziun. L'invista po vegnir refusada, sche interess da segrezzza impurtants pretendan quai.

⁵ Il cussegli federal regla la procedura d'invista. En cas da disputas èsi pussaivel da purtar plant tar il Tribunal federal svizzer tenor l'artitgel 120 alinea 1 litera b da la Lescha federala dals 17 da zercladur 2005³⁴ davart il Tribunal federal.

⁶ Il Cussegli federal regla il sustegn da la surveglianza ierarchica chantunala tras posts da la Confederaziun.

3. secziun Protecziun giuridica

Art. 83

¹ Cunter disposiziuns ch'èn vegnidas decretadas d'organs federals sin basa da questa lescha po vegnir fatg recurs tar il Tribunal administrativ federal.

² Ils recurs cunter disposiziuns davart l'obligaziun speziala da persunas privatas da dar infurmaziuns sco er davart ils scumonds d'activitat u d'organisaziun n'hant nagin effect suspensiv.

³ Il termin da recurs cunter l'ordinaziun d'ina mesira da procuraziun suittamessa ad in'autorisaziun cumenza a currer il di che suonda il di, che la communicaziun da la mesira è vegnida retschavida.

⁴ Cunter decisiuns da recurs dal Tribunal administrativ federal poi vegnir fatg recurs tar il Tribunal federal. La procedura sa drizza tenor la Lescha dals 17 da zercladur 2005³⁵ davart il Tribunal federal.

³⁴ SR 173.110

³⁵ SR 173.110

7. chapitel Disposiziuns finalas

Art. 84 Disposiziuns executivas

Il Cussegl federal decretescha las disposiziuns executivas.

Art. 85 Execuziun tras ils chantuns

¹ Ils chantuns procuran ed elavuran infurmaziuns tenor l'artitgel 6 alinea 1 litera a senza vegnir intimads da far quai u sin basa d'ina incumbensa speziala dal SIC. En quest connex èn las autoritads executivas chantunlas autorisadas d'applitgar autonomamain las mesiras da procurazion betg suttamessas a l'autorisaziun tenor ils artitgels 13–15, 19, 20, 23 e 25.

² Las autoritads executivas chantunlas communitegeschan al SIC – senza ch'ellas sajan vegnididas intimadas – infurmaziuns, sch'ellas constateschan ina smanatscha concreta da la segirezza interna u externa.

³ Per exequir questa lescha collavura il SIC cun ils chantuns, en spezial cun metter a disposiziun medis tecnics, cun mesiras da protecziun e d'observaziun sco er cun por-scher scolaziuns cuminaivlas.

⁴ Ils chantuns sustegnan il SIC en il rom da lur pussaivladads tar l'execuziun da sias incumbensas, en spezial cun:

- a. metter a disposiziun ils medis tecnics necessaris;
- b. incitar las mesiras da protecziun e d'observaziun necessarias;
- c. cooperar tar la scolaziun.

⁵ En il rom dals credits deliberads indemnisescha la Confederazion als chantuns las prestaziuns ch'ellas furneschan per exequir questa lescha. Il Cussegl federal fixescha pauschalmain l'indemnisaziun sin basa da la cifra da las personas che lavuran oravant tut per incumbensas federalas.

Art. 86 Aboliziun e midada d'auters decrets

L'aboliziun e la midada d'auters decrets vegnan regladas en l'agiunta.

Art. 87 Coordinaziun cun las midadas dals 25 da settember 2015 da la Lescha federala davart il servetsch civil

...³⁶

³⁶ La disposiziun da coordinaziun po vegnir consultada en la AS 2017 4095.

Art. 88 Referendum ed entrada en vigur

- 1 Questa lescha è suttamessa al referendum facultativ.
- 2 Il Cussegl federal fixescha l'entrada en vigur.

Data da l'entrada en vigur: 1. da settember 2017³⁷

³⁷ COCF dals 16 d'avust 2017.

Agiunta
(art. 86)

Aboliziun e midada d'auters decrets

I

La Lescha federala dals 3 d'october 2008³⁸ davart las cumpetenzas en il sectur dal servetsch d'infurmaziun civil vegn abolida.

II

Ils decrets qua sutvart vegnan midads sco suonda:

...³⁹

³⁸ [AS 2009 6565, 2012 3745 agiunta cifra 1 5525, 2014 3223]

³⁹ Las midadas pon vegnir consultadas en la AS 2017 4095.